

der Lappen von Z. bis X. bey Num: 53. verzeichneter / sol ein wenig herdan von dem Kopff des Ross/gebogen seyn/ der Bug C. vnd der Zapffen I. der Stangen/ sollen starck gemacht werden / dann an diesen Orthern der grösste Gewalt geschicht/ Das vnterste Ketlein an der Stangen / muß vmb  $\frac{1}{4}$  Zahl vngesähr kürzer seyn/ als das Mundstück weit ist / Das Häcklein bey Num: 53. 54. mit Q. bezaichnet/ daran die Ring der Zügl hengen / sollen kurz vnd gewerbig seyn.

### Nota.

Wann die Stangen lang vnd viel vorgeschossen seyn/ so schlagen sie sich gern Kreuzweis vber einander/ der Sporer sol die Stangen biegen / wie sie seyn sollen im Feuer/ vnd nicht nachdem er sie schon gefeilt hat/ erst kalter richten/ dann sie bekommen sonst leichtlich einen Bruch.

### Das Neun vnd Zwainzigste Capitel.

## Von Bucklen.

**D**ie Buckln zieren ein Pferd sehr / aber sie müssen nicht hoch erhoben/sondern flach/nicht zu groß vnd nach Proportion des Pferdes größe vnd Kopff gemacht / vnd auch nieder / das ist / nicht weit herdan von den Stangen auffgeniedt seyn.

### Das Dreyzigste Capitel.

## Von dem Rünraiff.

**D**ie Häcklein des Rünraiffs / so Num: 54. mit AB. bezaichnet/ sollen so lang seyn/ daß sie fast/ aber gleichwol nicht gar den Bug R. Num: 54. berühren/ sollen auch gebogen seyn/ wie Num: 51. bey M. N.O. zu sehen/ Item/ es sollen nur zwan S. vnd dieselben glat / zimlich dick/ rund vnd also geformbt/ daß die Glieder/ Häcklein vnd Ring/ zwar gern/ aber auff das genawest beysammen gehen / damit wenig lehres da zwischen sey/ wie Num: 51. bey T. zu sehen/ vnd das Wiederspiel Num: 51. bey P. außweist/ zwischen beede S. sol ein langlechter Ring wie R. außweist/ vnd nicht auch ein S. gemacht werden.